

ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРЛИГИ

ФАРГОНА ДАВЛАТ УНИВЕРСИТЕТИ

**FarDU.
ILMIY
XABARLAR-**

1995 йилдан нашр этилади
Йилда 6 марта чиқади

2-2021

**НАУЧНЫЙ
ВЕСТНИК.
ФерГУ**

Издаётся с 1995 года
Выходит 6 раз в год

АДАБИЁТШУНОСЛИК

М.Ражабова

Навоий ижодида күшлар ва ҳайвонлар образининг халқона асосларда ифодаланиши 74

Н.Шарафиддинова

Поэтик синтаксис тушунчасининг белгиланиши ва предмети 79

ТИЛШУНОСЛИК

М.Абдуллатоев

Полисиндетон – полифункционал синтактик фигура 87

М.Турдибеков

Конибодом тумани макро ва микро топонимлари 92

М.Усманова

“Кўхна дунё” асарида қўлланган арабий ва форсий изофанинг лингвистик хусусиятлари 96

М.Иброхимова, Т.Алимов

Лингвокреатив медиамайдонда тилнинг экологик соғлигини сақлаш 99

М.Мадаминова

Мурожаат шаклларининг прагматик хосланиши 104

С.Хабибуллаева

Исажон Султон ҳикояларида маънодош ҳамда зид маъноли сўзларнинг лексик-семантик хусусияти 111

А.Уралов

Асимметрик дуализм ва функционал транспозиция 115

ПЕДАГОГИКА, ПСИХОЛОГИЯ

Р.Сафарова

Ўқувчиларда маданий дунёқарашни шакллантириш параметрлари 120

Э.Мирзажонова

Шахснинг когнитив ривожланишининг эрта ташхиси ва ўзаро боғлиқлиги таълим самарадорлиги омили сифатида 124

М.Туйчиева

Ўқув фани материалларини ўқишлилик даражасини оширадиган таълим методлари 129

ИЛМИЙ АХБОРОТ

М.Рахимов, Х.Муйдинов, А.Комилжонов

Четдан келтирилган қорамол ғунажинларини парваришлашнинг жадал технологияси 134

Р.Пирназаров

Қурбонқўл қулама тўғонининг фильтрацион кўрсаткичларини ҳисоблаш 137

Б.Холматова

Учинчи ренессанс даврида маънавий ишлаб чиқаришни юксалтириш эҳтиёжи 140

Н.Собиров, С.Исройлова

Хўжанддаги биринчи дунё урушининг Австрия-Венгрия кучларининг излари 144

М.Болтабоев

Совет ҳокимияти ўрнатилган йилларда вақф мулкларининг аҳволи 147

Д.Абдуллаев

Музей жамланмасида давлат мукофотларининг ўрни ва аҳамияти 150

Н.Исрайлов

“Шарқ кутубхонаси” асарида Амир Темур томонидан хурсоннинг забт этилиши масаласини ўрганилиши 154

А.Мусаев

XVII аср бошларида Фарғона водийсидаги сиёсий кураш 159

С.Ҳамрақулов

“Фарғона” газетасида хорижий мамлакатлардаги воқеаларнинг ёритилиши 163

НАВОЙ ИЖОДИДА ҚУШЛАР ВА ҲАЙВОНЛАР ОБРАЗИНИНГ ХАЛҚОНА
АСОСЛАРДА ИФОДАЛАНИШИ

ИЗОБРАЖЕНИЕ ОБРАЗОВ ПТИЦ И ЖИВОТНЫХ В ТВОРЧЕСТВЕ АЛИШЕРА НАВОИ
НА ОСНОВЕ НАРОДНОГО МЫШЛЕНИЯ

THE NATIONAL EXPRESSIONS OF BIRDS AND ANIMALS' IMAGES IN THE WORKS
OF ALISHER NAVOI

Ражабова Маърифат Бақоевна¹

¹Ражабова Маърифат Бақоевна

— Бухоро давлат университети ўзбек адабиёти кафедраси доценти, филология фанлари номзоди.

Аннотация

Алишер Навоий ижодида поэтонимларнинг турфа кўринишлари учрайди. Ушбу мақолада халқ бадиий тафаккури асосида шакллантирилган зоопоэтоним ва орнитомифопоэтонимлар хусусида фикр юритилади. Қушлар ва ҳайвонлар сингари мифологик образлар орқали бадиий талқин қилинган ғоя ва мотивлар таҳлиллар орқали ёритиб берилади.

Annotation

В творчестве Алишера Навои встречаются разные виды поэтонимов. В статье рассматриваются зоопоэтонимы и орнитомифопоэтонимы, сформированные на основе народного художественного мышления. Идеи и мотивы художественно интерпретированы и проанализированы с помощью мифологических образов, таких как птицы и животные.

Annotation

Various types of poetonyms can be observed in Alisher Navoi's creative activity. The article discusses zoopoetonyms and ornithomythopoetonyms formed on the basis of folk artistic thoughts. The ideas and motifs interpreted artistically via mythological images such as birds and animals are depicted through analysis.

Таянч сўз ва иборалар: мифологик образ, поэтоним, зоопоэтоним, орнитомифопоэтонимлар, самандар, ҳайвон, ит.

Ключевые слова и выражения: мифологический образ, поэтоним, зоопоэтоним, орнитомифопоэтонимы, самандар - мифическая птица животное, пес.

Key words and expressions: a mythological image, a poetonym, a zoopoetonym, an ornithomythopoetonym, a samandar – a mythical bird, an animal, a dog.

Фольклор қадимий сўз санъати сифатида ўзига хос ғоявийлиги ва бадиияти билан улугъ ӯзбек мутафаккир шоири Алишер Навоий эътиборини ҳам тортди. Шоир фольклорнинг афсона, ривоят, эртак, нақл, достон, қўшиқ, мақол, топишмоқ, асқия каби қатор жанрларининг композицион қурилиши, сюжет мотивлари, анъанавий образлари, ифода усули ва тасвирий воситаларидан ижодий фойдаланиб, халқ тили ва дилига яқин асарларни маҳорат билан яратди.

Фольклор илоҳий-ирфоний манбалар қаторида Алишер Навоий ижодининг шаклланиши ва ривожланишида асосий таянч манба вазифасини бажара олди. Шоирнинг бадиий ижодда фольклор тажрибасига суюниши, унинг материалларини ижодий ўзлаштириш негизида қайта ишлаши (синтез ва стилизация қилиши) натижасида асарлари халқчиллиги оширилган.

Алишер Навоийнинг назмий ва насрый асарлари қаватларида халқимизнинг

мифологик тасаввурлари асосида юзага келган поэтик тимсоллар ва образларнинг бутун бир тизими мавжудки, уларни ўрганиш улуғ шоир ижодининг асос манбалари хусусида тўлақонли тасаввур ҳосил қилишга кўмаклашади. Жумладан, шоир шеъриятида ва достонларида кўп учрайдиган образлардан **қушлар ва ҳайвонлар** сингари мифологик образлар стилизацияси кўп кузатилади. Н.Маллаев таъкидлаганидек: “Ҳар қандай поэзия мифлар билан бошланади” [5,9]. Дарҳақиқат, ушбу фикр тасдиғи Алишер Навоий ижоди мисолида ҳам ўз тасдиғини намоён этади.

Шоир турли (реал ва мифологик) қушлар образидан кенг фойдаланар экан, уларни ўзига хос тарзда рамзийлаштирганига гувоҳ бўлиш мумкин. Жумладан, шоир кўпроқ булбул, қарға (зоғ), тўти, товус, ҳудхуд каби қушлар образига кўпроқ мурожаат қилганлиги кузатилади. Бунда шоир ўз даври анъанасига кўра, кўпинча булбулни ошиқ тимсолида образлантирган:

АДАБИЁТШУНОСЛИК

Булбул не куймасунки, бир ўт ёқти қасдиға

Хар оташин гул ушбу вафосиз чаман аро [1,44].

Бу мисраларда булбул ошиқ, гул маңызуқа тимсолида талқин этилаётгани сезилиб турибди.

Шоир баъзи мисраларида булбул билан зогни зид келтиради:

Элга кўюнгдур макон, мен қулни қавмоғлиғ недур,

Булбул ўлса, зог ҳам бўлур гулистонлар аро [1,42].

Бу мисраларда булбул яхшилар, зог эса ёмонлар рамзини ифодалаш учун келтирилмоқда.

Дарду ғам бўстонининг товусидир кўнглум қуши,

Гул бўлиб жисмимда кесган наъл ҳар ёндин анга[1,46].

Шоир кўпинча гўзап ёрнинг хиром айлаб юришини товусга ўхшатган.

Алишер Навоий қўллаган қушлар образи орасида Ҳумо, Анқо, Симурғ, Самандар (Қақнус) кабилар **орнитомифопозтоним** сифатида дикқатни тортади. Масалан, шоир лирик меросида Самандар образига кўп бора мурожаат қилинган ва у билан боғлиқ тасвиirlар мифологик қарашларга асослангани билан эътиборни тортади.

Самандар – майда бир жонивор. У афсонага кура, гўё ўтдан пайдо бўлиб, ўт ичида яшайдиган қушдир. Бу қушнинг ўтда ёнмаслиги ҳақидаги тасаввурлар орқали мумтоз адабиётда абадий ҳаёт ва ишқ ғоялари тарғиб қилинган. “Алишер Навоий ижодиётида ўлмаслик ҳақидаги мифология излари “Қақнус” ва “Самандар” образида ҳамда Масих (Исо) ва Хизр номи билан боғлиқ ҳолда сақланиб қолган [5,106].

Алишер Навоий лирик меросида Самандар тасвири билан боғлиқ байтлар салмоқли қисмни ташкил қилса, Қақнус тасвири фақат “Бадоев ул-бидоя” девонининг 22-ғазалидагина қўллангани кузатилади. Навоий Қақнус образини қўллашда ҳам салафлари анъаналарини давом эттиргани намоён бўлади. Шунинг учун Қақнус билан боғлиқ мушоҳадаларига “Лисон ут-тайр”, “Фарҳод ва Ширин”, “Садди Искандарий” достонларида кенг ўрин берилган. Масалан, “Фарҳод ва Ширин” достонида Самандарнинг тумшуғида кўп тешиклар бор бўлиб, улардан тараалган ҳазин овозлардан мусиқа яралashi айтилса, “Лисон ут-тайр” достонида Қақнуснинг Хиндистанда бўлиши, баланд дарахтлар

бошига ин солиши, умри бўйи хас-хашак, чўп, катта хирмон йиғиб, ҳаётининг охирида шу хирмон устида майин оҳанг билан сайраши, унинг дилкаш навосини эшитган бутун ўрмондаги қуш ва ҳайвонлар йиғилиб келиши, охирида Қақнус шундай аламли бир нола қилганидан хирмонига ўт туташиб кетиши ва шу ўтда ўзи ҳам ёниб кетиши, хирмон кули остидан янги бир Қақнус боласи пар ёзиб чиқиб, секин-аста парвоз қилиши, у ҳам отаси шуғулланган иш – хас-чўп тўплашга уннаб кетиши баён этилади.

Навоий “Фарҳод ва Ширин” достонида салафи Ҳусрав Дехлавийнинг шеъриятидаги мусикийликни, дил ўртовчи ҳазинликни ана шу Қақнуснинг сайрашига ўхшатган.

Самандар ўтдан пайдо бўлиб, ўт ичида яшави жиҳатидан Қақнус қушига ўхшаб кетиши айтилади.

Бало ичра далир урма қадам то ошиқ ўлмайсен,

Самандар бўлмагунча кирса бўлмас ўт аро густох [1,109].

Насрий баёни: Ошиқ бўлмасдан туриб, бало даштига довюракман, дея қадам босма, чунки ҳар қандай қўрқмас инсон ҳам Самандарга айланмагунча олов ичига кира олмайди.

Алишер Навоий ҳақиқий ошиқ ва ишқ масаласини бадиий тасвиirlашда бевосита Самандар образидан фойдаланади. Шоирнинг таъкидича, ошиқ ишқда Самандардек “йўқ бўлмас” экан, бу йўлдаги “бало”ларга бардош бера олмайди.

Алишер Навоий лирикасида ишқ улуғланади. Шоир бу олий неъмат ҳаммага ҳам насиб қилавермаслигини қуйидаги байтда таъкидлар экан, Самандарни мисол келтиради. Яъни ҳақиқий ошиқ “ишқ ичра” Самандардек кириши учун “ишқ ўти”га мансуб бўлиши кераклигини таъкидлайди.

Ўт ичра тушса бўлур нисбати самандардек,

Кишики, ишқинг ўтиға ўзин қилиб мансуб [1,68].

Алишер Навоий кўпинча ишқ ва ошиқлик масаласини бадиий тасвиirlашда муболагадан ўринли фойдаланади. Бундан кўзланган мақсад эса ишқни улуғлаш, ошиқлик сифатларига урғу беришdir.

Оташкада ўтида самандар топар ҳаёт,
Кўнглумўти валек самандарни куйдурур [2,168].

Алишер Навоий ошиқликни улуғлар экан, ҳатто ҳақиқий ошиқни Самандардан устун қўяди. Ошиқ кўнглидаги ишқ ўти шу даражада

АДАБИЁТШУНОСЛИК

ҳароратли ва кучлики, у ўтда пайдо бўлиб, ўтда яшовчи Самандарни ҳам куйдиради.

Худди шу руҳдаги байтни “Фарҳод ва Ширин” достонининг XLV бобида, яъни Шириннинг Фарҳодга ёзган мактубида ҳам учратиш мумкин:

Демон бир шамъдин парвона сори,
Самандардин бир оташхона сори.

Байтнинг мазмуни: (Бу мактубни) куйиб – ёнаётган бир шамдан парвонага эмас, бир самандардан бир гулхан (оташхона)га йўллайман.

Байтда ноанъанавийлик кузатилади. Яъни, шоир барча ғазалларида Самандар тимсолида ошиқга ишора қилса, мазкур байтда маъшуқага ишора қиласди. Айни пайтда байтда Навоий ҳам талмех, ҳам истиора (гулхан – Фарҳод; самандар – Ширин) санъатларини қўллайди. Самандарнинг оловда туғилиб, олов ичиди яшаши биргина “оташхона” сўзи орқали берилади. Бундан ташқари, самандар мактуби (ишқи)нинг “оташхона” (гулхан)га йўлланиши орқали ошиқ ва маъшуқа ишқининг бирлашиб кетиши, яъни “ваҳдат ул-вужуд”ни ҳосил қилиши назарда тутилган.

Мазкур достонда Самандар нафсоний ҳисларни енгиш воситаси сифатида ҳам қўлланади. Устози Суҳайло ҳаким Фарҳодга нафс рамзи бўлмиш аждахони енгиш мақсадида унинг ўтини қайтариш учун самандар ёғини беради. Фарҳод аждар билан олишув пайтида ўт-оловдан сақланиш учун у бир идишда берган мана шу самандар ёғини бадан ва қўлларига суркаб, ўт таъсир қилмас ҳолатга киради.

Деди: «Бу зарфким маръи бўлодур.
Самандар ёғидин билким тўлодур.
Кўп оташгоҳ ўтидин тормишам дод
Ки, то жамъ айламишмен бу қадар ёғ.
Чу аждар бирла бўлғунгдур ҳамовард
Ки, андин чиққуси афлок уза гард.
Бу ёғдин суртуб аввал ўз танингға,
Самандар ҳамлалиғ хопоканингта
Ки, аждар бирла разм этган замонда,
Бу ёғ ўтдин сени тутқай амонда

[3,152].

Фарҳоднинг бутун вужудига суртилган самандар ёғи уни аждаҳо (нафс)нинг ҳамласидан асрайди.

Алишер Навоий Фарҳод тимсолида комил инсон ҳақидаги қараашларни бадий тасвиirlар экан, нафсга қарши кураш масаласига алоҳида эътибор қаратиши бежиз эмас. Боиси, инсон вужудидаги ноқисликлар нафс ғулғулалари туфайли вужудга келади. Уни енгиш эса инсоннинг комиллик сифатларига эга бўлишида муҳим саналган.

Хуллас, улуғ шоир Алишер Навоий Самандар образи орқали ишқнинг абадийлигини таъкидлайди. “Ўлмаслик” ва “абадий ҳаёт” ҳақидаги мифология ва фольклор намуналаридан куйланган мавзулар доирасини тасаввуфий қарашлар билан кенгайтиради.

Шоир ижодида зоопоэтонимларга, яъни ҳайвонлар образига ҳам алоҳида эътибор қаратилган. Алишер Навоий ғазалларида турли жониворлар образининг рамзий-тимсолий талқини кузатилади. Лекин шулар орасида шоир лирикасида энг кўп қўлланилган образлардан бири итдир.

Ўзбек фольклорида ит тимсоли кўпинча вафодор ва содик ҳамроҳ, йўлдош, ҳомий-қўмакчи поэтик вазифаларида талқин қилинган бўлса, Алишер Навоий ижодида ит билан боғлиқ қуидаги тушунчалар ифодаси кўзга ташланади:

1. Итнинг овози, териси ёки унга тегишли нарсаларни магик даво воситаси сифатида талқин этиш:

Гар Навоийға даводур унунг, эй ёр ити,
Хординг эркинки, тонг откунча ҳуарарсен
охир [2,154].

Ушбу байтда ошиқ учун суюкли ёр итининг ҳуриган овози даво экани хусусида сўз юритилаётгани бежиз эмас. Халқ орасида янги туғилган чақалоқларга “ит қўйлак” кийдириш, касалманд чақалоқни ит терисига йўргаклаш, қўзига говмижжа (халқ тилида – иттирсак) чиққанларни эрта тонгда итга салом қилишга ундаш, суқланганларга итнинг жума кунги оқ тезагини тутатиш, жуда оғир касалга чалингандарга ит ялогидан сув ичкизиш каби иримлар тарқалган. Демак, шоир кишилар ўртасида ит культига сифиниш билан боғлиқ шу каби иримлар мавжудлигини, тотемистик қадимий қараашларнинг излари сақланиб келинаётганини инобатга олиб, юқоридаги мисраларда ўзига хос сўз ўйинини амалга оширган. У, биринчидан, ишқ дардидан ўртаниб, яримжон аҳволга тушган ошиқ кўнглини итнинг синган сафолига мензаган. Иккинчидан, оғир ишқ дардига мубтало ошиқ учун ит сафолидан ичилган сув (ҳайвон суви – тириклик суви) даво эканини таъкидлаган. Жумладан, ошиқ кўнглиниг итлар синган сафолига тенгглаштирилиши қуидаги байтда ёрқин акс этган:

Юру, эй Хизрким, ҳайвон суйидур заҳр агар ичсан,

Бу дамким жоним ул шўх итлари синғон сафолидур [1,177].

АДАБИЁТШУНОСЛИК

Умуман айтганда, Навоий ғазаларида “итнинг синган сафоли” образига жуда кўп дуч келиш мумкин:

Итинг синган сафолида май ичсам
Не тонг, илгимга жоми Жам тушубтур [2,158].

Кўриняптики, бу мисраларда итнинг синган сафоли афсонавий Жамшид жомига тенглаштириб талқин қилинган бўлса, баъзан ҳатто ундан устун ҳам кўйилади:

Итларинг синган сафоли тушгач илгимга, кўнгул

Онча фахр этики жоми бирла Жамшид этмагай [2,853].

Ошиқ итнинг синган сафолидан ичган бода (май)ни тириклик сувига тенглаштиради:

Итларинг синган сафоли ичра бўлдум дурдкаш,

Бўлмасун ҳаргиз тихи ул бодадин бу соғарим [2,367].

Ёки:

Ичтим итинг сафолида май, ваҳ, қачон ювғай

Ҳайвон зилоли завқини онинг мазоқдин [1,427].

Кўйидаги мисраларда итнинг чанги, итнинг териси ит культи, яъни итни ҳомий, кўмакчи сифатида қараш билан боғлиқ тушунчалар асосида берилгани сезилади:

Саодат хатлари қилмиш ҳувайдо,

Итинг чангига суртилган жабиним [2,380].

Яна:

Фалак бошингга қоплаб **ит терисин**,
Сен они жаҳлдин деб кишу синжоб [1,75].

2. Алишер Навоий нопок, очкўз, ғаламис кимсаларни ит образи воситасида фош этган. Уларнинг сатирик ва киноявий образини очиб берган. Бунга шоирнинг “итлар” радиблиғазали ёрқин мисол бўла олади:

Бошимға кўйида ҳар дам ғулу қилур итлар,

Гар ўлмасам, бу ғулуни нағу қилур итлар [2,135].

3. Навоий ғазаларида учрайдиган “Итлари оллиға ташлангки, гизо қилсунлар”, “Итингки борди қилиб туъма бағриму юрагим”, “Тўъмаким топмас итинг урса тани зоримға тиш”, “Итингга озроқ эса туъма пора-пора боғир”, “Қолмиш итлар оғзида мажнуни урёним менинг”, “Қилмаса хориж танимни, итларига судратиб” сингари мисралари бағрида ўлим билан боғлиқ қадимги урф-одат излари яширингани билан эътиборни тортади. Чунки қадимда ёши улуғ, кексайиб қолган кишиларни тириклай маҳсус боқилган итларга ем

қилишган. Бу ҳақда Страбон ҳам маълумот қолдирган [4,10].

4. Халқ орасида, одатда, ўзлигини йўқотган, босар-тусарини билмай қолган кимсалар қутурган, яъни ҳеч кимни аямайдиган, ҳатто эгасини ҳам танимай қолган итга ўхшатилади. Шуни инобатга олиб, Навоий шеърларида ҳам мана шундай кимсаларга “қутуз ит”, “телба ит” образи орқали киноя қилингани кузатилади:

Телбадур нокас рақибинг, қатл эрур вожиб анга,

Мундин ўзга йўқ иложи итким бўлғай кутуз [2,193].

Қутурган ит халқ тилида “қутуз”, “қутуз очган” иборалари билан юритилади. Ҳатто халқ орасида “Қутуз очгур” деган қарғиш ҳам бор. Чунки, қутурган ит қопган одам ҳам қутуриш касаллига чалинади ва орадан қирқ кун ўтгач, у ҳам итдек одамларга ташланиб тишлишга интилади. Шунинг учун одамлар қутурган ит ва одамдан ҳаммавақт қочиб, эҳтиёт бўлишган. Ана шуни инобатга олиб, Навоий ҳам “Расмдур қочмоқ улус иттинким, ул бўлғай қутуз” ёки “Ажаб йўқ, тотса ҳар ит телбараб оғзидин ўт сочқай” дея огоҳлантиради.

5. Халқ ижодидаги каби Навоий ҳам итни вафодорлик тимсолида кўп қўллаган. Бунда шоир “Асқоби қаҳв” афсонаси мазмунига таянган.

Чун дедим, зулфунг камандин бўйнума солғил,

Деди: Итга бўлмас Каъба қандили танобидин марас [2,199].

6. Навоийнинг баъзи байтларида ит рақиб, душман сифатида ҳам талқин қилинган. Масалан: “Рақибинг ҳам, итинг ҳам кўнглума кўюнгда душмандур” деб ёзади шоир бир байтида.

7. Кечалар итларнинг аккиллаши, тонгда қушларнинг сайраши инсон ҳиссиётларига таъсир қилувчи омиллардан биридир. Шунинг учун бу ҳолат ҳам шоир назаридан четда қолмаган:

Буки ваҳшу тайр уютмаслар, ғамим бедодидин,

Кеча ит афгонидин бил, субҳ қуш фарёдидин [2,416].

8. Ўтмишда ов жараёнида қуш, ит, тулки кабилардан фойдаланилган. Шу сабабли Навоийнинг қўйидаги мисрасида сайд (ов) чоғи тулки билан ўйнашган ит образига эътибор қаратилган:

Зоҳид била нафс этса тамасхур, не ажабким,

АДАБИЁТШУНОСЛИК

Ит сайд қилур вақтида тулку била ўйнар [2,164].

9. Итлар қатли, ҳатто улар дайди ит бўлса-да, фақат шоҳлар фармонига мувофиқ амалга оширилган:

Ўлтурур кўйида ишқ ахлин алолоси учун,
Шоҳ қатл этган киби итларни ғавғоси
учун [2,413].

Ёки:

Кўйида атфоли ушшоқ ўлтурур бедор ила
Шаҳ магар шаҳр ичра ит қатлиға фармон
айламиш [2,241].

10. Жониворлар ичида ит уйқуга
кетишидан олдин бошини панжалари устига
қўяр экан. Ит бошини деярли ерга қўйиб
ухламас экан. Шу маънода шоир бошни
авайлаш, омон сақлаш зарурлигини айтиш
учун бевосита ит уйқуси тасвирини келтирган:

Кўйи тоши бошима ҳайф айласам уйқу
ҳавас,

Ит уюр бўлса аёғ, илги бошин қўймоқقا
бас [2,199].

Навоий ит образини ҳамма вақт кўчма
маънода эмас, ўз маъносида ҳам қўллаган. Бу
унинг қуйидаги мисраси мисолида яқъол
англенишлари: “Итки, номардумлуғидин
ошносин тишлади” – дейди шоир. Бу билан
шоир ит итлигини қилишидан, барибир у
одамзод билан ножинслиги туфайли ҳар қанча
вафодор бўлмасин, ҳайвонлигини қилишидан
огоҳ этади.

Хулоса қилиб айтганда, мумтоз адабиёт
намуналарида ҳам халқ оғзаки ижодидаги каби
диний-ижтимоий тасвиirlар турли поэтик
кўчимларга асосланади. Бироқ мумтоз
шеърият намуналарида учрайдиган шундай
тасвиirlар борки, уларни халқ лирикасидаги
тотем ва культларнинг тарихи ва моҳиятини
тушунмай англаш мушкул.

Адабиётлар:

1. Алишер Навоий Муқаммал асарлар тўплами. XX жилдлик. I жилд. Бадоев ул-бидоя. – Т.: Фан, 1987.
2. Алишер Навоий Муқаммал асарлар тўплами. XX жилдлик. II жилд. Наводир ун-ниҳоя. – Т.: Фан, 1987.
3. Алишер Навоий. Муқаммал асарлар тўплами. XX жилдлик. VIII жилд. Фарҳод ва Ширин. – Т.: Фан, 1991.
4. Легенды, мифы, предания. – М.: Эра, 1992.
5. Маллаев. Алишер Навоий ва халқ ижодиёти. – Т.: Faafur Fулом номидаги нашриёт-матбаа ижодий
уи, 2015.

(Тақризчи: А. Сабирдинов – филология фанлари доктори).